

waenganui o Ingarangi me Parani, i mahue tetahi tangata raua ko tana tamaahine ki te kapiuke i te ki o nga poti. I te karangatanga atu a taua kaumatua kia whakaorangia tana tamaiti ka hoki mai tetahi tangata ki te kapiuke, ka whakaatea i tona nohoanga mo te wahine. I ora taua wahine; ko tona matua me tona kai-whakaora i mate. To te Karaitiana tona ahua. — I te rerenga mai o te Ohiana i Amerika ki te Tonga, ki Ingarangi, ka taka te heramana ki te moana, i te kaha o te hau. I te roa o te tukunga i te poti, ka rere he Nowitini ki te whakaora i tona hoa. I te ekena o te heramana ki te poti ka mahue te Nowitini ki te mate, katahi ka rere hoki te heramana ki te whakaora i tona kai-whakaora. I ora katoa raua, engari ko te Nowitini wahi iti tonu ka mate. — E £5000 te utu i hoatu e te kamupene o te Perthshire kia te Tarune. — I rere mai a te Waikato ki Niu Tirenī nei i Ingarangi, kaore ano kia u noa, kua nui rawa hoki nga ra e ngaro ana.

RONGOMAITAWHITI.

Nga korero mai o Rarotongā, o te taenga o te Kawana ki reira me te marenatanga o te Kingi o era atu moutere, kei te tinana o "Te Pipiwaharuroa." — Kua tino mutu rawa atu te whawhai o Hamoa. I ringaringa a Marictoa raua ko Mataawha i runga i a te Patia, manaua o te Komihana. E kiia ana e haere ana a Marietoa ki Poihakena ki te whakaoti i tona kura. He roa ta matou korero mo Hamoa i tera putanga o ta tatou manu. — I kaha rawa te riri a nga Marikena me nga Piripaini i a Hune nei. I potaengia etahi hoia e nga maori, a kihai i kaha ki te hoki ki te matua, katahi ka tu ki te riri. I tangohia mai e nga apiha nga pu a nga hoia taotu hei pupuhi i nga maori e pupuhi mai ana i runga i te rakau. No te paunga o nga kariri, ka hoki ka tapahia he huarahi mo ratou i roto tonu i nga hauhau. Ko Rewheteneti Tonowhano kotahi maero i to haere ai i tona waewae whati i roto i te poharu. E 4000 hoia o Amerika kei roto i nga hohipera o Piripaina. Te Tiamana o nga Piripaini ko Akuingarō. — I te koronupepa a te Maori, kaore e rongō i nga korero o te ao. I nga tau e wha kua pahure ake nei te tino korero o Parani, te whenua o te Wiwi, tetahi hoki o nga tino korero o te ao, ko te whakawakanga i a Tereiwahu (Dreyfus.) Ko taua tangata he Hurai, he apiha no te ope hoia o Parani. I whakapaea ia etahi apiha he tutei na Tiamani. I te whakawakanga a ona hoa apiha i a ia whakahaua ana kia hereheretia ia ki tetahi moutere o te moana, e tata ana ki Amerika ki te tonga, mo te mate to-

nu atu ki reira, i te tau 1894. No muri mai ka kitea i he te whakawakanga i taua tangata, he mea tito noa. Heoi ko te kinonga i kino ai taua whenua, ka wehewehe, ka ririiri hoki. I runga i te tohe nui a etahi tangata, a tana wahine hoki, ki te Kawanatanga kia whakawakia ano a Tereiwahu, kua mauria mai ia ki Parani, ki whakawakia tuaruaatia ano. Ki te ki mai a nga waea kua hina taua tangata i te kawenga a te pouri, a te koingo hoki ki tana wahine. I tona kitenga i tana wahine kore rawa ia i kaha ki te korero, heoi ano ta raua korero he ngunguru, he tangi. I a Tereiwahu i runga i te tereina e haere ana ki Rene, ki te taone e whakawakia ai ia, he tangi tonu tana mahi. I tona haerenga ano ki te Motu o te Rewera, ki te motu i hereheretia ai ia, ka mutu tona rongō ki nga korero o te ao. Houtu ana tona manawa i nga korero a tana wahine kia ia, i nga korero o te riri a te iwi moana i muri i a ia. Ki te puta tenei tangata, ki tana wahine te honore nui. Kore i rikarika te toa o taua wahine, ki te pitihana kia ata tirohia ano te bara o tona ariki. Ki te whakaaaro a te nuinga o te tangata, he mea whakapae teka taua tangata. E kiia ana i paungia ia e tetahi mate piwa, engari kua pai haere i naianei tona mate. E te Atua whakaarohia te hunga e patua hetia ana!

RONGOMAITATA.

TE PAREMATA: I te whaikorero a te Honore Timi Kara, Hekeretari o te Koroni, i Turanga i tino kaha tana tautoko i tona Kawanatanga, i kauwhautia hoki e ia nga painga i puta mai ki te iwi i runga i te kaha o te Kawanatanga ki te awhina. Ki tana ki hoki heoi ano te tikanga hei painga mo nga Maori ko te tuku i te toenga o ratou whenua ma te pari e whakahaere. Ka nui te tohe o nga pakeha o Turanga nei kia whakatuheratia nga whenua o te Tairawhiti. Oira e toru nga ra i muri mai ka whaikorero a te Piukenana te mema o Wairarapa, he tino tangata no te Apiti-hana. I kaha tana whakahe i te Kawanatanga. Ana take whakahe:— (1.) Mo te kaha o te Kawanatanga ki te kai i nga moni a te Koroni. (2.) Mo te hoatutanga i te tiwhikete kapene ki tetahi tangata o Poneke, kahore nei e tika kia riro i a ia. (3.) Mo te hoatutanga i te Ripaka o N. Tirenī ki tetahi pakeha kahore nei e tika kia riro i a ia. Tenei ake te nuinga o ana korero, engari kaore e mohiotia ko ta wai ranei te mea tika. He korero ke ta te Kawanatanga, he korero ke ta te Apiti-hana.